

2015 brunch



Niejaors brunch 2015

Same met 'n aantal Rapido-vreejwilligers kins se op 'ne zaoterdaagmorge van 'ne kale zaal bes wat leuks make. Ut is efkes stevig aanpakke maar nao 2 eurkes hebs se dan ouk wat

en smak die tas kóffie des te baeter.

De kins op 4 januari netuurlik thoes de kersrómmel weer de zólder op doen maar det is neet leuk veur die 3 keuninge, dan blieve die weer met eur kedoos zitte.

Zón dieke 90 minse van Rapido hadde det waal begrepe en zien 't nije sportjaor van Rapido met 'ne gezellige Niejaors-brunch begónne. Netuurlik kries se met 'ne leuk aangekleide zaal den boék neet vol.

Dus 'n aantal minse hebbe wat maonde van teveure zitte te prakkezere; wie kins se 't idderein nao de zin make veur 'n raejelijk klein bedraag. Dao ware we al snel oet, want met Rob en Helmie as ervare buffetkoks, met hölp van Francy, kin Rapido zich toch op de **nekse kónt** klatse, det meug gezag. D'r waar wat werms, wat gezónds, wat kluntjes- en wat krintemik, wat fruit, lekker toetje.....neum maar op.

Life cooking in de groeëte pan, det is pas **ROEREI** make. Rob had netuurlik ouk geflambeerde pannekukskes kinne doen maar hae vónd det 't van ald op niej al genóg had gefik en geknald. 'T daak van 't kräömke had det ouk neet euverlaef.

Bart ziene **muzikale quiz** zoot leuk inein en idderein kós meidinke um de bewuste letters beejein te kriege.

De **jeugaafdeiling** had de oplossing al snel gevónde en ze kreges 'ne dieke priés dae gesponsord waar door Henk S.

Ik heb gehuurd det 'n gedeilte van de priéswinnaars qua badmintonne in opleiding zien beej United.....

wae wét zien det de Rapidoleeje van **de toekóms**.



D'r zien al mier vrugere United-speulers beej ós club, die euren drei beej Rapido gevónde hebbe.

Heej en dao hoors se **de nije veurnemes** veur 2015.

Oétscheie met rouke, 'n paar of vuuel kilo's aafvalle, minder werke.....

De kins die veurnemes baeter zachjes dinke dan hardop zegge

want beej de iersvolgende verjäärdaag begint 't genäöl al.

Iers kump de vraog; bis se al vuuel aafgevalle,

beej jao.....nou, nou det is knap van dich huur.

Paks se gen stök vlaai is 't kómmentaar;

doot neet zoeë óngezellig, det éin stökske vlaai kin toch gen kwaod.

Paks se gen 2e glaeske wien maar vruueg se **“aendewater”**

dan bis se 'ne zeikerd en weer óngezellig bezig.

Asof de gezelligheid aafhingk van 'n stök in de kónt en 'n vol liéf.



Oetscheie met rouke bliek nog vuuel lastiger te zien.

Iers begins se met nicotine-pleisters op de gekste plaatse op dien lief te plekke.

As det nao 2 waeke neet werk maks se 'n aafspraak beej de **acupuncturist**.

Dae begint met heej en dao waat naolde in dien lief te staeke,

neet te gluive... die naolde weite persies waat ze mótte doon.

Eigelik te gek veur wäördmaar 't werk efkes.

Aevel nao 4 waeke zaet de femielie

pak dich in godsnaam 'n sigaret want 'ne gruttere **greek** guf 't neet in Venlo.

Det neume ze noow; **emus de pis ein bietje lauw make** um toch in de fout te gaon.

Van dien femielie mós se 't maar hebbe.

Idderein wet det alles wao TE véur steit neet good is behalve **TEVREEJE**.

Laot maar idderein **aandoedele** en begin gewoeën tevreeje en gezónd aan 't nije jaor.

Kiek maar good um dich haer, want de **meiste moeie dinger** zien veur lau.

Waat wils se nog mieër.



Elly van Elswijk